



auoit loysir de deffendre sa cause deuant le iuge. Or ceste Matze est vne choucque d'arbres ou de vignes avec ses racines entourillées ensemble, sur laquelle ilz mettent vnelayde figure de face humaine, laquelle semble vn faulx visage & comme vn fantosme. i'ay ouy dire, que le magistrat ne peult appaiser la rage de ce peuple furieux, quād ilz accourent avec leur Matze à la maison de quelque homme suspecté d'aucun crime. Or chascune diocese a ses Matzes. Oultreplus il faut entendre, qu'au pays de Vualais les hommes & les femmes ont coutumierement des grosses enfleures soubz le menton appelées goetres & pensant que cela vient à cause de l'eau qu'ilz boiuent. Mais, i' en ay veu plusieurs, & mesme des plus grandz personages qui portoyent leurs goetres en la poitrine, & non obstant ilz ne boyent iamais de l'eau, ou s'ilz en boyent c'est bien peu souuent, si non qu'on veuille dire qu'ilz ayēt acquis ceste deformite de corps en leur ieunesse.

Du magistrat & gouvernement de la

republicque du pays de Vualais.

L'euuesque de Syon est prince & seigneur de tout le pays de Vualais, & du hault & du bas pays, tant en temporalite qu'en spiritualite, & Charlemaigne enuiron l'an 805. bail



la ceste comte & gouvernement saint Theodore, euuesque de Syon, & à touz ses successeurs. Plusieurs aultres empereurs aussi ont depuis ratifié & conserme ceste donation iusques à present.

Or apres que l'euuesque, est mort les chanoyēs & les deputez par les sept dixaines en ordonnent vn aultre, en la place d'icelluy, & apres qu'ilz ont fait l'election, on luy adioint vn personnage garny d'authorite iudiciare pour appointer & definir des causes ciuiles, lequel est capitaine de toute la region. Or ce capitaine est esleu par les ambassadeurs & commis du prince & des sept dixaines enuiron Noel, au conseil commun de tout le pays, & son office dure deux ans. Il est accōpaigne de six ou sept seruiteurs à cheual aux despens du prince. Le prince fait sa residence en la ville de Syon, & a en iurisdiction six chasteaux ou forteresses assez bien munitez & deux à Syon, à scauoir Meyerin en la ville, & Turbillō qui est en vne montaigne eminente qui touche à la ville, vne aultre à Naters, vne aultre à Leuck, vne aultre, à Enfisch, & vne aultre à Martinacht, mais ceste derniere fust bruslée soubz cardinal Matthieu. L'an de salut 1417. ceulz du pays de Vualais feirēt alliance aux ceulx de Lucerne, Uri, & ceulx de Vnderuualde. & la premiere obligation de bourgeoisie fust faite avec ces cinq dixaines, Syō, Syders, Visp, Brig, & Gōbs. Plus apres l'an de grace 1533. ceste alliance fust renouvelle, & declairée plus apertement, & amplifiée par

Adrien de Riedmat euuesque de Syō, & par le chapitre de l'eglise cathedrale, & les sept dixaines de tout le pays de Vualais avec les trois susditz catons, Lucerne, Uri, & Vnderuualde, & avec Suuitz, Zoug, Fribourg & Soleurre. Ceste alliance fust faite à Lucerne vn iour de mercredy deuant la feste S. Thomas. Il y eut aussi alliance faite avec les Bernois premierement l'an 1447. & depuis du temps Seigneur Gauthier il y eust vne aultre nouvelle alliance faite, & l'ancienne du tout abolie le 7. iour de Septembre l'an 1475. L'an 1536. lors que le roy de France & les Bernois chasserēt le duc de Sauoye pour certaines causes hors de son pays, & faisirent ses terres vne partie de ceulx de la terre de Chablais se rendist aux sept dixaine de Vualais: laquelle est auourd'hui gouvernée par 3. baillifz, que ceulx du hault pays de Valais y enuoyent. Ces trois bailliages s'appellent, Monthey, tsiuan, & Hochtal. En

L'euuesque du Syon seigneur du pays de Vualais.

Les chasteaux de l'euuesque.

Les confederations de ceulx de Vualais avec les Suysjes.

ces trois bailliages il y a grande quantité d'ours, de certz, biches sanglers, cheureulz, & autres bestes sauuages.

De la ville de Syon & autres villes

du pays de Vualaiç.

Tout le pays
de Vualaiç est
une uille.

LA ville capitale du pays de Vualaiç a este de le temps iaditz appellée Sedunum, en Allemand Sitten, en Frãcois Syon: & les habitantz vsent de deux langages. les vns parlent Allemand, & les autres parlent Sauosien. Et les Vualesiens n'ont point d'autre ville muraillee, que Syon, toutesfois il y a des belles places, combien qu'on pourroit bien reputer saint Maurice pour vne ville. Les habitantz ont toute la vallée depuis saint Maurice iusques au mont de la Fourche pour vne ville, laquelle tant du coste droit que du coste gauche est fermée de môtaignes inaccessibles & de rochers inuincibles, qui seruent de murailles, la porte & l'entrée c'est saint Maurice. Ilz estiment donc que ce seroit vne chose superflue & inutile, si on enuironnoit toutes les villes de murailles. Iaditz quand la regio n'estoit point toute subiette à vn mesme seigneur ou prince, ains que d'une seigneurie on auoit fait deux iurisditiōs, les boutz & extremitez furent fermées d'une muraille, & ce la estoit bien pres de Brig, laquelle s'est doyt & s'est d'encore (cōbien qu'elle soit toute ruinée de puis la riuere du Rhosne iusques aux montaignes du midy, & ce lieu est appelle en Allemand Amgstein, c'est à dire aux pierres, & n'ay peu trouuer personne mesme en toute la region, qui m'ayt peu dire pour quelle cause ceulz du pays hault de Vualaiç se sont separez des autres, ou en quel temps ceste separation de pays ayt este faicte. Mais pour retourner à Syon, il faut entendre que selon la coustume du pays c'est vne belle ville, & les bastimens d'icelle croissent toutz les iours en haulte. La ville touche à vne môtaigne, laquelle enleua peu a peu vers l'orient au milieu de la plaine en les haultes montaignes qui ferment la vallée, & est faicte en facon de forche, s'esleuat au dessus de la ville en deux petitz môtz eminentz. La montaigne qui est à la main dextre, a le Rhosne au pied en la vallée, & est appelle Valeria, laquelle a este vne forte place autrefois, mais maintenant les chanoynes y demeurent, & ont la l'eglise cathedrale, combien toutesfois que la vraye & ancienne eglise episcopale soit en la ville mesme apres de la porte Gundes. Du ceste fenestre de la ville & du lieu où l'euesque faict sa residence, il s'esleue peu a peu vne montaigne pierreuse fort estroite, laquelle deuient beaucoup plus haulte que n'est pas celle de Valeria, & a des deux costez de lieux malaisez, & dangereux à cheoir, auxquelz on ne peut pas facilement monter par quelque industrie ou labour humain que ce soit, & principalement du coste de septentrion, & ceste montée dure autant qu'une hac que butte pour tirer loing, & sur le fin bout d'icelle il y a vn chasteau fort & assis en plaissant & beau lieu, lequel est appelle Tyrbile ou Turbillion. Le chasteau Tyrbile ou Turbillion, a beaucoup de belles plaissantes chambres & habitations, il y a aussi du bon vin là dedans, duquel on donne a boyre aux estrangiers qui sont la menez pour veoir ledit chasteau. Le prince se retire la avec sa famille, quand les chaleurs sont trop grandes au plus bas chasteau, de autant, qu'air est la plus tempere qu'au bas chasteau, lequel est appelle Mayerin, & est basty sur vn rocher eminent, qui a cause de sa haulteur passe presque toutz les edifices de la ville, exceptez bien peu de bastimentz qui sont viz à viz d'icelluy au pied du mont Valeria, comme est la maison magnifique du Seigneur Iehan Kalbermatter, & bien peu d'autres. Au reste on ne scauroit dire cōbien est fertile le territoire de Syon. Il ne fault point chercher la l'entour du vin plus excellent ne meilleur pain. Il y a des jardins plaissantz & gracieux, de belles prayries, & beaux uergiers. D'auantage il y a si grande abondance de miel, que par tout l'année on en tire hors des ruches des mouches a miel. Il y a aussi grande abondance de bons fromages en toute le pays de Vualaiç, mais principalement à l'entour de Syon. On pesche la de fort excellentz poissons au Rhosne, & singulierement des truittes si grandes, que quelques fois elles poissent 30. liures. ilz sont aussi grande prouission de chairs salées, & principalement de brebiz grasses & de moutons. Ilz ne les seichent point à la fumée, mais en l'air, & puis apres les grenadent en la paille, & les ayment mieux ainsi que si elles estoient fumées.

La uille